

La chascharia dal Plantahof en nov vestgì

La mesemna passada ha già lieu la festa d'inauguraziun da la chascharia

■ **(anr/ac) La chascharia dal Plantahof è vegnida sanada cumpletmain. Grazia ad indrizz da chaschar moderns po la scolaziun al Plantahof vegnir meglierada. La publicitad po prender in vista dals novs stabiliments l'atun proxim.** Actualmain èn 24 signunas e signuns londervi da sa perfecziunar en ils misteris da chaschar. Els fan part dal curs fundamental da chaschar ch'il center da cussegliaziun e scolaziun al Plantahof porscha regularmain per segirar il persunal a las alps da chaschar grischunas. Las futuras signunas ed ils futurs signuns dastgan far quai en stabiliments cumpletmain sanads ed equipads cun indrizz moderns. Sco quai ch'il chau dal servetsch da cussegliaziun al Plantahof, *Curdin Foppa*, ha fatg a savair derivan ils participants dal curs fundamental per gronda part da la Svizra e da la Germania. Sulet dus Grischuns èn da la partida. La dumonda per il curs fundamental ed era per la scolaziun supplementara da chaschar è anc adina gronda sco quai che ha declerà *Curdin Foppa*. Per pudair sa participar als curs ston ils participants posseder enconuschientschas praticas davart l'alpegiaziun ed els ston posseder in contract da lavur per ina alp grischuna. Sulet sch'ils basegns da las alps grischunas èn ademplids pertutgant signunas e signuns resguarda il center da scolaziun ulteriurs participants. Dapli che 24 participants na vegnan betg resguardads. Quel dumber lubescha da lavurar a moda pratica. *Curdin Foppa* ha fatg attent ch'ils ulteriurs curs d'elavurar latg,



■ **Is novs indrizz da la chascharia dal Plantahof lubeschan ina scolaziun pratica per futuras signunas e futurs signuns.**

MAD

purschids a puras e purs, chattian adina dapli accoglientscha. Ultra da la producziun da products enconuschents duain era vegnir creadas novas ideas e novs products per il martgà. Quai saja il motiv ch'il chantun Grischun saja sa decidi dad investir en la chascharia integrada en il center da scolaziun e cussegliaziun al Plantahof. Ina purschida da scolaziun da chaschar paregliabla cun quella

dal Plantahof exista sulet anc en il chantun Berna.

Lavurs da sanaziun tenor minenergie

La chascharia dal Plantahof è vegnida construida l'onn 1957 da l'architect G. Schäfer, Cuira. Suenter passa 50 onns d'utilisaziun intensiva ha l'edifizi già in basegn da sanaziun che correspunda a sia vegliadetgna. Entaifer 7 mais èn ve-

gnids sanads ils mirs esteriurs ed ils indrizz da la tecnica da chasa tenor il standard da minenergie per var 1,7 milliuns francs, quai sut la direcziun da *Marcel Liesch*, architect da Cuira. Per ils mantels da la fatschada èn vegnidas duvradas schlondas da laresch. Ils indrizz da la chascharia èn vegnids adattads al standard tecnic actual, ils andaments da manaschi èn vegnids optimads, ed igl èn

vegnids construids access tenor ils basegns da persunas cun impediments. Las grondas fanestras porschan da nova a las visitadras ed als visitaders ina invista en la producziun al plaunterren. Il bajetg serva uschia era sco plattform a la nova campagna turistica da Svizra Turissem che vul carmalar hosps cun isanzas e cultura indigena. Per *Curdin Foppa* nagin problem: «Nus essan pronts.» En il plaunterren sa chattan la chascharia, la producziun da specialitads sco er il labor da culturas. Al plaun sutterran sa chattan las localitads da deposit, al plaun sura ils biros e las abitaziuns da persunal. Tras la sanaziun exemplarica da l'edifizi e dal manaschi da la chascharia vegn rinforzada vivand la preschientscha dal Plantahof.

Ina instituziun apprezzada

Il center da furmaziun e cussegliaziun agricola Plantahof a Landquart vegn manà sco manaschi certifigà ISO cun ina incarica da prestaziun e cun in preventiv global ed el giuda ina stima che tanscha lunsch sur il cunfin dal chantun ora. Cunzunt las allevaturas ed ils allevatur d'animals sco er las possessuras ed ils possessurs da muaglia da l'entira Svizra e da l'esteriur germanofon apprezzeschan la tradiziun da seminaris da furmaziun supplementara, d'experiments pratics innovativs e d'ina tratga da muvel d'alta qualitat dal Plantahof. Ma er la scolaziun da pura e da pur che vegn purschida vala sin plaun nazional sco moderna, variada e pretensiusa.